



ՎԵՀԱՓԱՌԻ ՀԱՅՐԱՊԵՏԻ ՔԱՐՈԶԸ
ԵՐԵՎԱՆԻ ՍՈՒՐԲ ՍԱՐԳԻՍ ԵԿԵՂԵՑՈՒՄ
(11 մայիսի 1980 թ.)

«Յանուն Հօր և Որդույ և Հոգույն Սրբոյ, ամէն»:

«Փառք Քեզ Աստուած, փառք Քեզ, յաղագս ամենայնի փառք Քեզ Տէր»:
Սիրելի հավատացյալներ, այս մաղթանքը, գրեթե, մեր ամենօրյա մաղթանքներից մեկն է:

Մեր կյանքում, մեր այս եղկրային կյանքում բազում անգամներ հանդիպում ենք դժվարությունների, երբեմն գրկանքների կամ անհաջողությունների, երբեմն նույնիսկ դժբախտությունների, մեր ընտանեկան հարկերի տակ, մեր ընկերային շրջանակում, մեր հայրենական կյանքում: Ահա թե ինչու, երբ մենք խաղաղ ու հանգիստ օրեր ենք ապրում, հոգեպես մխիթարված և բարօր կացության մեջ, մեր սրտից բխում է այս աղոթքը առ Աստված: Ահա այսպիսի մի օր է այսօր մեզ համար, և կարծում ենք նաև ձեզ բոլորիդ համար, որովհետև խաղաղ և մխիթարված սրտերով հավաքվել եք այստեղ աղոթելու և լսելու կաթողիկոսի խոսքը:

Մենք գալիս ենք Սուրբ Էջմիածնից՝ բերելու Աստուծո օրհնությունը ձեզի բոլորիդ, բերելու Մեր սերը և ողջույնը հայրական և բարի մաղթանքները, որ Աստված բոլորդ պահե, պահպանե քաջառողջ, հեռու ամեն տեսակ փորձություններից, երջանիկ ձեր ընտանեկան հարկերի ներքև և հաջողություններով ձեր աշխատանքի վայրերում:

Գալիս ենք Սուրբ Էջմիածնից՝ բերելու Մեր սիրո ողջույնը, գնահատանքի խոսքը Արարատյան թեմի Մեր փոխանորդ Տ. Կոմիտաս արքեպիսկոպոսին, նրա օգնական հայր սուրբին, քահանայից դասուն, վարչական անդամներին, պաշտոնյաներին, երգչախումբին և բոլոր նրանց, ովքեր սրբազան հոր կողքին կանգնած աշխատում են իրենց լավագույնը անել, որպեսզի Արարատյան թեմի եկեղեցիները հետզհետե բարեկարգ վիճակի մեջ մտնեն:

Այս առթիվ Մենք չենք կարող մոռանալ նաև Մեր երախտագիտությունը հայտնել մեր քաղաքային և պետական իշխանություններին, որոնք Սուրբ Սարգիս եկեղեցու վերանորոգման տարիներին և ընդհանրապես մեր շինարարական ծրագրերի ճանապարհի վրա, բացառիկ բարյացակամությամբ, հոգատարությամբ օժանդակում են մեզ:

Սիրելի ժողովուրդ, Մեր խոսքի սկզբին փառք տալով Աստծուն ասում էինք, թե ինչքան հոգեպես մխիթարված ենք ու երջանիկ, որ մենք հավաքվել ենք այստեղ, մեր մայր քաղաք Երևանի սրտի վրա, խաղաղ, ապահով պայմաններում՝ մեր հոգևոր կյանքը ապրելու համար: Այս իրողությունը Մենք ուզում ենք հաստատել այս պահին և հիշեցնել ձեզ, որ մեր օրերի Հայաստանի խաղաղ ու ապահով կյանքը, հառաջադեմ ու ծաղկուն կյանքը,



ՎԵՀԱՓԱՆԻ ՀԱՅՐԱՊԵՏԸ Ս. ՍԱՐԳԻՍ ԵԿԵՂԵՑՈՒՄ ՔԱՐՈՋԵԼԻՍ

մենք պարտական ենք այն մեծ հաղթանակին, այն աշխարհաստան հաղթանակին, որի ոգեկոչումը կատարվեց ամբողջ սովետական աշխարհում ու նաև արտասահմանում, երկու օրեր առաջ՝ մայիսի 9-ին:

Մի հաղթանակ, որ կապված է անհաշիվ տառապանքների և զոհաբերումներին հետ: Դուք գիտեք, որ Սովետական ամբողջ Միությունը, բոլոր ժողովուրդները, Հայրենական այդ մեծ պատերազմում տվեցին շուրջ քսան միլիոն զոհեր, որի մեջ փոքր չէր թիվը նաև հայոց զոհերի՝ մեր ժողովրդի թվի համեմատությամբ: Հայերն էլ քաջաբար կռվեցին և պատվով դուրս եկան այդ մեծ մարտից և իրենց բաժինը բերեցին մեծ հաղթանակին: Մի հաղթանակ, որով ջախջախվեցին յոթ գլուխները հիտլերյան հրեշի: Ահա այսպես փրկվեցինք նաև մենք՝ Հայաստանում:

Անշուշտ ձեզանից բոլոր նրանք, ովքեր այդ օրերին Հայաստանում էին գտնվում, հատկապես 1948 թվին, գիտեն որ գերմանական բանակները ահռելի ուժեր կուտակած հառաջանում էին դեպի Վոլգայի ափերը, ուր տեղի ունեցավ աշխարհի պատմության ամենամեծ ճակատամարտը, վասն հայրենիքի ազատության, փրկության, երբ ռուսական զորքերը հրաշքի համագործակցությամբ ի հայտ բերեցին և փառավոր հաղթանակով պսակվեցին: Բայց մինչ այդ հաղթանակը, այդ օրերին մեր Մայր Հայաստանի արևմտյան կողմը, Արաքսի ափերին, կուտակված էր թուրքական հզոր մի բանակ՝ զինված գերմանական զենքերով, որոնք սպասում էին այն պահին, որ Վոլգայի ափերին ռուսները պարտվեն և անմիջապես իրենք հարձակվեն Հայաստանի վրա և Հայաստանի վրաշով: Այդ դեպքում Արևմտյան Հայաստանի մեծ եղեռնը պիտի կրկնվեր նաև Արևելյան Հայաստանում և պիտի բնաջնջվեր մեր ժողովուրդը նաև այստեղ: Մոխրի պիտի վերածվեին Երևանն ու Էջմիածինը և ամբողջ Հայաստանը:

Ահա թե ինչու, սիրելի ժողովուրդ, հայրենական մեծ հաղթանակը ոգեկոչելիս, մենք պարտք ենք համարում այստեղ մեր աղոթքը բարձրացնել դեպի երկինք ու մի անգամ ևս բացականչել. «Փառք Քեզ Աստուած, փառք Քեզ, յաղագս ամենայնի փառք Քեզ Տէր», և Մենք, իբրև Հայ Եկեղեցու առաջին պաշտոնյա և համայն Հայաստանյայց Եկեղեցին ամուր կանգնած մեր ժողովրդի կողքին, մեր հայրենիքի գերագույն շահերի պատվանդանի վրա, մաղթում ենք և աղոթում, որ Տէրը աշխարհի խաղաղությունը պահպանի ամուր և անսասան, որ ոչ մի տեղ այլևս չկրկնվեն եղեռներ և ցեղասպանություններ, որ միջազգային հարցերը, վիճելի հարցերը կարգավորվեն խաղաղ ճանապարհներով, բանակցություններով, փոխադարձ հասկացողությամբ և մարդկությունը այս արևի տակ շարունակի իր խաղաղ և շինարար կյանքը, հերջանկություն բոլոր ժողովուրդներին: Հերջանկություն նաև մեր փոքրիկ ազգին, որ ահա քանի անգամներ մահվան անդունդից փրկված, այսօր ապրում է, աճում և զարգանում և մեր հայրենիքը հետըգհետե բարգավաճում և ծաղկում է հաղթական երթով:

Թող Աստված, Հարցն մերոց մնա միշտ պահապան և օգնական մեր ազգին, մեր ժողովրդին և զորացնի մեր զավակների բազուկի ուժը, մտքի լույսը և նա նաև հետ այսու եղբայրական ժողովուրդների մեծ ընտանիքում հառաջավոր դիրքերի վրա հետզհետե իրականացնի իր արդար երազանքները:

«Ծնորհք և խաղաղութիւն Յիսուսի Քրիստոսի եղիցին ընդ ձեզ, այժմ և միշտ, ամէն»: